

## **Inatsisissatut siunnersuummut oqaaseqaatit**

### **Oqaaseqaatit nalinginnaasut**

#### **1. Inatsisissatut siunnersuutip tunngavia**

Akileraarutit A-t aamma iluanaarutisianit akileraarutit akilerneqarnissaannut piffissaliussat piffissaliussamut manna tikillugu atuuttumut sanilliullugit ullunik 11-t missaannik, Inatsisartut 2013-imi ukiakkut ataatsimiinneranni kinguartinneqarput, taamaalilluni piffissaagallartil-lugu akiliiffissaq kingulleq tassaalerluni qaammatip akiligassanngorfiup kingorna qaammatip tulluuttup ulluisa aallaqqaataat (Aningaasarsianit akileraarutit pillugit Inatsisartut inatsisaata allanngortinneqarneranik siunnersuut, UKA 2013/100).

Aningaasat unerartitsisussaataasup akiligassallip aningaasarsiassaani ilanngartuutigisani (akissarsianit ilanngaartigisani) akileraarutit A-t aamma sulisoqarnermut akitsuutip akilerneqarnerat ilutigalugu nalinginnaasumik akilerneqartarput.

Nassuiaammik nassiussinissamut ilanngaatigineqarsimasunillu akiliinissamut maannakkut piffissarititaasut Pisortanut akiitsut akilersinniarneqartarnerat pillugu Namminersorlutik Oqartussat nalunaarutaanni nr. 9, 1. juli 2010-meersumi § 19-imi allassimapput. Inatsisitigut illersugaanissaq pissutigalugu piumasaavoq aningaasat ilanngartuutigineqartut pillugit nassuiaammik nassiussinissamut akiliinissamullu piffissarititaasut inatsimmi aalajangersarneqassasut, soorlu akileraartarnermi akitsuusiisarnermilu taamak pisoqartoq.

Taamaattumik siunnersuutaavoq aningaasat § 3, Kalaallit Nunaanni eqqartuussisarnermik inatsimmi § 625 imaluunniit Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi § 101 naapertorlugu ilanngartuutigineqartut akilerneqarnissaannut piffissarititaasup allanngortinneqarnissaa pillugu siunnersuummik, sulisoqarnermut akitsuutip piffissaagallartillugu akilerneqarnissaanut piffissaliussap allanngortinneqarnissaa-nik siunnersuuteqarnertuulli saqqummiussisoqassasoq.

#### **2. Siunnersuutip imarisai pingaarnertit**

Inatsisissatut siunnersuut aningaasat ilanngartuutigineqartut (akissarsianit ilanngaatigineqartut) akilernissaannut piffissaliussamik allanguinissamik imaqqarpoq. Piffissaliussaq qaammatip akiligassanngorfiup ulluisa 20-anniit qaammatip akiligassanngorfiup kingorna qaammatip tulluuttup ulluisa aallaqqaataannut allanngortinneqarpoq.

Siunnersuut akileraarutit A-t aamma iluanaarutisianit akileraarutit akilerneqarnissaannut piffissaliussat allanngortinneqarnerannut (UKA 2013/100), akileraarutit A-t aamma iluanaaruti-

sianit akileraarutit akilernerqarnissaannut piffissaliussamik qaammatip akiligassanngorfiup kingorna qaammatip tulluuttup ulluisa aallaqqaataannut kinguartitsinermik kinguneqartumut atuumassuteqarpoq.

<b>Inatsisissatut siunnersuut inatsimmut atuuttumut sanilliullugu</b>	
<i>Oqaasertai atuuttut</i>	<i>Inatsisissatut siunnersuut</i>
	<p><b>§ 1</b>  Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaanni nr. 3, 2. maj 1996-imeersumi, Inatsisartut inatsisaatigut nr. 6, 15. april 2011-meersukkut kingullermik allanngortinneqartumi makku allannguutigitinneqarput:</p>
	<p><b>1.</b> § 3-p kingorna ilanngunneqarpoq:  ”§ 3 a. Aningaasanik tunniunneqartussanik § 3, Kalaallit Nunaanni eqqartuussisarnermik inatsimmi § 625 imaluunniit Aningaasarsianit akileraarutit pillugit Inatsisartut inatsisaanni § 101 naapertorlugu ilanngartuisup, qaammatisiutit malillugit qaammatip siuliani ilanngartuutigineqartut (akissarsianit ilanngaaticineqartut) qaammatip ulluisa kingusinnerpaamik 10-at nallertinnagu akileraaruseriffimmut nalunaarutigisussaavai . Qaammatip ulluisa 10-at arfininngorneruppat, sapaataappat nalliuttuuppalluunniit piffissarititaasoq ulluinnarmut tullermut qaninnermut sivitsorneqassaaq.  <i>Imm. 2.</i> Ilanngartuisup ilanngartuinini ilutigalugu aningaasat ilanngartuutigineqartut qanoq amerlatiginerat akiligassalimmut allakkatigut nalunaarutigissavaa.  <i>Imm. 3.</i> Aningaasat ilanngartuutigineqartut qaammatisiutit malillugit qaammatip tulluuttup aallaqqaataani akiligassanngussapput. Piffissaagallartillugu akiliiffissaq kingulleq tassavoq qaammatip akiligassanngorfiup kingorna qaammatip tulluuttup ulluisa aallaqqaataat. Ulloq piffissaagallartillugu akiliiffissaq kingulleq arfininngorneruppat, sapaataappat nalliuttuuppalluunniit piffissarititaasoq ulluinnarmut tullermut sivitsorneqassaaq.”</p>

	§ 2
--	-----

	<i>Imm. 1.</i> Inatsisartut inatsisaat 1. juni 2015-imi atuutilissaaq.
--	--

### **3. Pisortanut aningaasatigut allaffissornikkullu sunniutissai**

Siunnersuut akileraaruseriffiup sulisitsisut akiliutaannik naatsorsuutitut nalunaarsuilluni maannakkut suliarisartagaanut allaffissornikkut sipaarutaangaatsiassangatinneqarpoq.

### **4. Inuussutissarsiutinik ingerlataqartunut aningaasatigut allaffissornikkullu sunniutissai**

Siunnersuut taasarialinnik aningaasatigut sunniuteqassangatinneqanngilaq.

Siunnersuut inuussutissarsiutinik ingerlataqartunut allaffissornikkut sunniuteqassangatinneqanngilaq.

### **5. Avatangiisinut, pinngortitamut inuillu peqqissusiannut sunniutissai**

Avatangiisinut pinngortitamullu sunniuteqarnaviannngilaq.

### **6. Innuttaasunut sunniutissai**

Siunnersuut innuttaasunut allaaffissornikkut sunniuteqartussatut ilimagineqanngilaq.

### **7. Sunniutissai pingaarutillit allat**

Inatsisissatut siunnersuut allanik sunniuteqartussatut ilimagineqanngilaq.

### **8. Oqartussaasunik kattuffinnillu il.il. tusarniaaneq**

Inatsisissatut siunnersuut piffissami 11. juni 2014-imiit 16. juli 2014-imut ukununnga tusarniaassutigineqarpoq:

KANUKOKA, Kalaallit Nunaanni Sulisitsisut Peqatigiiffiat (GA), NUSUKA, S.I.K., KNAPK, KPMG Grønland, Deloitte, Grønlands Revisionskontor, Aalisarnermut, Piniarnermut Nunalerinermullu Naalakkersuisoqarfik aamma Inuussutissarsiornermut, Aatsitassaqaarmut Suliffeqarnermullu Naalakkersuisoqarfik.

Aamma inatsisissatut siunnersuut oqaaseqaatitaalu Tusarniaavimmi tamanut saqqummiunneqarput uani [www.naalakkersuisut.gl](http://www.naalakkersuisut.gl).

Tusarniaanermi akissuteqarnissamut piffissaliussaq qaangiummat tusarniaanermi akissutisiffigineqarput KANUKOKA, Kalaallit Nunaanni Sulisitsisut Peqatigiiffiat (GA) aamma SIK.

Oqaaseqaatit tiguneqartut ataani nalinginnaasumik allanneqarput, Naalakkersuisullu oqaaseqaataat *uingasumik* allanneqarlutik.

KANUKOKA-p kommunit sinnerlugit nalunaarutigaa inatsisissatut siunnersuutip tusarniaassutigineqarnera akissuteqarfigineqassanngitsoq, tassami tusarniaaneq taama sivikitsigisumik piffissaqarluni, aammalu tusarniaanermut akissuteqarnissaq julip qaammataanut inissinneqarsimammat tunngavilersorluakkamik akissuteqarfigineqarsinnaanngimmat. KANUKOKA-p kissaatigaa Inatsisartunut ilaasortat ilisimatinneqassasut inatsisissatut siunnersuutip tusarniaassutigineqarnera kommunit akissuteqarfiginngikkaat, Namminersorlutimmi Oqartussat kommunillu julip qaammataata tusarniaaffiusannginnissaanik isumaqatigiissutaat 20. maj 2010-meersoq eqquutsinneqanngimmat.

SIK-p tusarniaanermut akissummini oqaatigaa tusarniaanermut piffissaliussatut ulluliunneqartut immikkoortoq 8-miittut, tassa oqartussaasunik kattuffinnillu tusarniaaneq, eqqortuunngitsut.

*Ullut eqqortut immikkoortumut maanna allanneqarput.*

Kalaallit Nunaanni Sulisitsisut Peqatigiiffiat siunnersuummut oqaaseqaatissaqanngilaq

## **Aalajangersakkanut ataasiakkaanut oqaaseqaatit**

### *§ 1-imut*

#### *Nr. 1-imut*

##### Imm. 1-imut

Siunnersuutaavoq aningaasanik tunniunneqartussanik § 3, Kalaallit Nunaanni eqqartuussisarnermik inatsimmi § 625 imaluunniit Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi § 101 naapertorlugu ilanngartuisup, qaammatisiutit malillugit qaammammi siuliani ilanngartuutigineqartut (akissarsianit ilanngaaticineqartut) qaammatip ulluisa kingusinnerpaamik 10-at nallertinnagu Akileraartarnermut Aqutsisoqarfimmut nalunaarutigisassagai.

##### Imm. 2-mut

Imm. 1 naapertorlugu ilanngartuisup aningaasat ilanngartuutigineqartut amerlassusiat akiligassalimmut allakkatigut nalunaarutigissavaa.

##### Imm. 3-mut

Ilutigitillugu siunnersuutaavoq aningaasat unerartinneqartut piffissaagallartillugu akilerneqarnissaannut piffissaliussaq qaammatip akiligassanngorfiup kingorna qaammatip tulluuttup ulluisa aallaqqaataannut aalajangersarneqassasoq. Piffissarititaasut arfininngorneruppata, sapaataallutilluunniit nalliuttuupputa nassuiaammik nassiussinissaq ullorluunniit ulluinnarmut tullermut kinguartinneqassaaq.

### *§ 2-mut*

Siunnersuutigineqarpoq Inatsisartut inatsisaat ulloq 1. juni 2015-imi atuutilissasoq.